



BEBAS...Junaidi (kiri) bertemu Rajpal sebaik dilepaskan daripada tuduhan mengedar dadah.

Bebas hukuman gantung

SHAH ALAM: "Saya ingin mulakan kehidupan baru di kampung halaman di Aceh," kata seorang pekerja kuari simen, Junaidi Ibrahim, 33, sebaik Mahkamah Tinggi di sini, semalam, melepaskan dan membebaskannya daripada dua pertuduhan mengedar dadah, tiga tahun lalu.

Keputusan Datuk Syed Ahmad Helmy Syed Ahmad nyata menggembirakan lelaki warga Aceh itu apatah lagi dia menghadapi hukuman gantung sampai mati kerana didakwa mengikut Seksyen 39B Akta Dadah Berbahaya (ADB) 1952.

Sebaik Syed Ahmad mengumumkan keputusan itu, Junaidi dilihat meraup mukanya dengan kedua-dua

tangan sebagai tanda syukur, selain berpelukan dengan peguam Rajpal Singh di luar mahkamah dan mengucapkan 'Alhamdulillah'.

Biarpun tiada ahli keluarganya hadir bagi mendengar keputusan di akhir pendakwaan semalam kerana berada di Simpang Mempelam, Aceh, Junaidi tetap gembira kerana terlepas hukuman gantung selain tidak dipanggil untuk membela diri.

Syed Ahmad membebaskan Junaidi daripada kedua-dua pertuduhan itu selepas mahkamah mendapati pihak pembelaan berjaya menimbulkan keraguan munasabah berhubung pertuduhan dihadapi tertuduh.